



Suechsch scho oder parggiersch no?

Nit nur Verständnis fir ihr Handle,
wenn si die halbi Stadt umwandle
vo Parggblätz in Begegningszone,
hänn Lyt, wo in so Zone wohne.
Fir d Kinder maag das glunge sy
und gwis au guet fir d Lunge sy.
Drotzdäm kai Fraid und ehnder Mieh
hänn sälbverständlich alli die,
wo immer noon en Auto hänn
und das naime parggiere wänn
und jetze halt der Kirzer ziehn
und fir e Pargghuus zahle mien.

Es git au Lyt, die riefen uus:
„S het nur no Bänggli vor em Huus
und Baim und Strycher und ai Rueh
und mir hänn uffsmool nyt meh z due,
mir hänn doch immer kontrolliert,
wär vor em Huus als z lang parggiert.“

Ins Baselbiet kaasch nit uuswyche,
dert dien si di jetz au verschyche,
wil de dert au e Buess kassiersch,
wenn d meh als 3 Stund lang parggiersch.

Bim Superblogg, däm Superspleen,
hänn d Esther und der Conradin
im Augschte bim Ereffnigsfescht
versicheret: „S isch nur e Tescht.
Die Bänggli, d Boulebahn, d Pergola
und s ganze wytere Drum und Draa
wird sorgfältig evaluiert
und s Parlamänt denn informiert.“
Und wär entschaidet s Wytermache
und was bassiert mit dääne Sache
wo dert jetz ummenanderstehn,
wenn si derfir kai Zuekunft gsehn?
Au wenn s e Huuffe Frooge git,
en Antwort druff bekunnt me nit.
Und dass es nur e Tescht soll sy,
isch däänen ihri Strategy
und glaube duet das dääne Zwai,
wenn d ummeloosisch jo kai Bai.
Was fir e Spruch kunnt maischtens draa?
Verzell du das em Fährimaa.

Bim Zolli isch es au gly umme,
mit em Parggiere, die wänn numme
no Jaguar mit Huut und Hoor
und nit mit Reeder und Motor.

Wenn d nit wottsch mit em Auto goh,
no kaa s au ganz lätz uusekoo:
Wenn d s Velo nimmsch, hesch e Brobleem,
denn was doo abgoht, isch extrem.
Kaasch no so mängs Schloss draa montiere,
es kaa der ainewääg bassiere,
eb Mountain-Bike oder au nit,
s isch ain iber alli Bärge dermit.

Und wottsch vorbildlig s Drämmli näh,
no kaa s au Schwirigkaite gää:
S isch graad e Demo und e Mais
oder si repariere d Glais.
Du wartsch und s Drämmli macht kai Wangg.
E legendäre Schnitzelbangg
het doo derzue, was sälte glingt,
e Värs gmacht, wo me hit no singt.

Was men au no zer Uuswahl het,
das wääre die E-Trotinett.
Fir s Klima wääre die e Hit,
fir d SUVA sin si s laider nit.

Zem Schluss jetz noon e guete Root
wie s Parggblatz finde spilend goht:
Am beschte mit Monopoly,
denn bi däm Spil liggt s immerhi
mit e bitz Gligg bim Wirfle dinne:
De kaasch e freie Parggblatz gwinne!

bsuech is au uff www.klosterraebe.ch

D Ladäärne-Uusstellig uff em Minschterplatz und d Waage- und Reggwisyte-Uusstellig bi dr Kasäärne sin vom Määntig znacht bis am Mittwuch demoorge. Deert und an de 3 Verkaufsständ (CINS) in dr Stadt ka men au alli Zeedel, Schnitzelbängg, und d Blaggedde kaufe.

D Zeedelläasete isch am Sunntig no dr Fasnacht 2026 am 1. Meerz vom Fimfi bis am Siiben zoobe, in dr Baseldytsche Bihni (im Lohnhof 4).

D Foyer-Baar isch vom Vieri ewägg offe und dr Yydritt isch frei.